

Rheoliadau drafft a osodwyd gerbron Senedd Cymru o dan adran 196(6)(a) o Ddeddf Gwasanaethau Cymdeithasol a Llesiant (Cymru) 2014, i'w cymeradwyo drwy benderfyniad gan Senedd Cymru.

OFFERYNNAU STATUDOL
CYMRU DRAFFT

2024 Rhif (Cy.)

GOFAL CYMDEITHASOL,
CYMRU

Rheoliadau Trefniadau Partneriaeth
(Diwygiadau Amrywiol etc.)
(Cymru) 2024

NODYN ESBONIADOL

(Nid yw'r nodyn hwn yn rhan o'r Rheoliadau)

Mae'r Rheoliadau hyn wedi eu gwneud o dan Ddeddf Gwasanaethau Cymdeithasol a Llesiant (Cymru) 2014 (dccc 4) ("y Ddeddf") ac maent yn diwygio'r Rheoliadau a ganlyn—

- Rheoliadau Trefniadau Partneriaeth (Cymru) 2015 (O.S. 2015/1989 (Cy. 299)) ("y Rheoliadau Trefniadau Partneriaeth");
- Rheoliadau Gofal a Chymorth (Cynllunio Ardal) (Cymru) 2017 (O.S. 2017/56 (Cy. 26)) ("y Rheoliadau Cynllunio Ardal");
- Rheoliadau Trefniadau Partneriaeth (Diwygio) a Gwasanaethau Rheoleiddiedig (Adroddiadau ar Sefydlogrwydd y Farchnad) (Cymru) 2021 (O.S. 2021/198 (Cy. 46)) ("y Rheoliadau Adroddiadau ar Sefydlogrwydd y Farchnad").

Mae rheoliadau 3 i 8 yn diwygio'r Rheoliadau Trefniadau Partneriaeth i ehangu amcanion bwrdd partneriaeth rhanbarthol, cynyddu nifer yr aelodau ar y bwrdd a gwneud darpariaeth ar gyfer dosbarth newydd ar aelod o'r bwrdd (aelod sy'n sylwedydd annibynnol).

Maent hefyd yn gwneud diwygiadau er mwyn gwella trefniadau gweinyddol byrddau partneriaeth rhanbarthol, gan gynnwys gofyniad i fwrdd gynnal hunanasesiadau cyfnodol o'i berfformiad, a

chynyddu'r ystod o wybodaeth y mae rhaid ei chynnwys yn ei adroddiad blynyddol.

Mae rheoliad 8 yn diwygio Atodlen 1 i'r Rheoliadau Trefniadau Partneriaeth fel bod rhaid arfer swyddogaethau awdurdod lleol o dan adran 12 o Fesur Plant a Theuluoedd (Cymru) 2010 (mccc 1) yn unol â threfniadau partneriaeth.

Mae rheoliad 9 yn diwygio'r Rheoliadau Cynllunio Ardal i gynyddu'r gofynion ar gyfer monitro a gwerthuso'r cynnydd a wneir gan y cyrff partneriaeth wrth gyflawni gweithredoedd a nodir mewn cynllun a luniwyd o dan adran 14A o'r Ddeddf.

Mae rheoliad 10 yn diwygio'r Rheoliadau Adroddiadau ar Sefydlogrwydd y Farchnad i newid y dyddiad erbyn pryd y mae rhaid cyhoeddi adroddiadau ar sefydlogrwydd y farchnad yn y dyfodol.

Ystyriwyd Cod Ymarfer Gweinidogion Cymru ar gynnal Asesiadau Effaith Rheoleiddiol mewn perthynas â'r Rheoliadau hyn. O ganlyniad, lluniwyd asesiad effaith rheoleiddiol o'r costau a'r manteision sy'n debygol o ddeillio o gydymffurfio â'r Rheoliadau hyn. Gellir cael copi oddi wrth: Llywodraeth Cymru, Parc Cathays, Caerdydd, CF10 3NQ ac mae wedi ei gyhoeddi ar www.llyw.cymru.

Rheoliadau drafft a osodwyd gerbron Senedd Cymru o dan adran 196(6)(a) o Ddeddf Gwasanaethau Cymdeithasol a Llesiant (Cymru) 2014, i'w cymeradwyo drwy benderfyniad gan Senedd Cymru.

OFFERYNNAU STATUDOL
CYMRU DRAFFT

2024 Rhif (Cy.)

**GOFAL CYMDEITHASOL,
CYMRU**

**Rheoliadau Trefniadau Partneriaeth
(Diwygiadau Amrywiol etc.)
(Cymru) 2024**

Gwnaed

Yn dod i rym

31 Rhagfyr 2024

Mae Gweinidogion Cymru, drwy arfer y pwerau a roddir gan adrannau 14A(7)(a), (b) a (d), 144B(1), 166(1)(b) a (2)(a)(ii), 168(2)(a), (c), (d) ac (e), a 196(2)(c) o Ddeddf Gwasanaethau Cymdeithasol a Llesiant (Cymru) 2014(1), yn gwneud y Rheoliadau a ganlyn.

Gosodwyd drafft o'r Rheoliadau hyn gerbron Senedd Cymru o dan adran 196(6)(a) o'r Ddeddf honno ac fe'i cymeradwywyd ganddi drwy benderfyniad(2).

-
- (1) 2014 dccc 4 ("y Ddeddf"). Mewnosodwyd adran 14A gan baragraff 34 o Atodlen 4 i Ddeddf Llesiant Cenedlaethau'r Dyfodol (Cymru) 2015 (dccc 2). Mewnosodwyd adran 144B gan adran 56(1) o Ddeddf Rheoleiddio ac Arolygu Gofal Cymdeithasol (Cymru) 2016 (dccc 2). *Gweler* adran 197(1) o'r Ddeddf am y diffiniad o "penodedig", "a bennir" ac "a bennwyd", a "rheoliadau".
- (2) *Gweler* hefyd adran 40 o Ddeddf Deddfwriaeth (Cymru) 2019 (dccc 4) am ddarpariaeth ynghylch y weithdrefn sy'n gymwys i'r offeryn hwn.

RHAN 1

Cyffredinol

Enwi, dod i rym a dehongli

1.—(1) Enw'r Rheoliadau hyn yw Rheoliadau Trefniadau Partneriaeth (Diwygiadau Amrywiol etc.) (Cymru) 2024.

(2) Daw'r Rheoliadau hyn i rym ar 31 Rhagfyr 2024.

(3) Yn y Rheoliadau hyn—

ystyr “y Rheoliadau Adroddiadau ar Sefydlogrwydd y Farchnad” (“*the Market Stability Reports Regulations*”) yw Rheoliadau Trefniadau Partneriaeth (Diwygio) a Gwasanaethau Rheoleiddiedig (Adroddiadau ar Sefydlogrwydd y Farchnad) (Cymru) 2021(1);

ystyr “y Rheoliadau Cynllunio Ardal” (“*the Area Planning Regulations*”) yw Rheoliadau Gofal a Chymorth (Cynllunio Ardal) (Cymru) 2017(2);

ystyr “y Rheoliadau Trefniadau Partneriaeth” (“*the Partnership Arrangements Regulations*”) yw Rheoliadau Trefniadau Partneriaeth (Cymru) 2015(3).

RHAN 2

Diwygio'r Rheoliadau Trefniadau Partneriaeth

2. Mae'r Rheoliadau Trefniadau Partneriaeth wedi eu diwygio yn unol â rheoliadau 3 i 8.

3. Yn rheoliad 1(4) (dehongli), yn y lleoedd priodol yn nhrefn yr wyddor mewnosoder—

“ystyr “Corff Llais y Dinesydd” (“*the Citizen Voice Body*”) yw Corff Llais y Dinesydd ar gyfer Iechyd a Gofal Cymdeithasol a sefydlwyd o dan adran 12(1) o Ddeddf Iechyd a Gofal Cymdeithasol (Ansawdd ac Ymgysylltu) (Cymru) 2020(4);”;

“ystyr “cynllun ardal” (“*area plan*”) yw'r cynllun y mae'n ofynnol i gorff perthnasol ei lunio yn unol ag adran 14A(2) o'r Ddeddf;”;

“ystyr “cynllun ardal ar y cyd” (“*joint area plan*”) yw cynllun ardal sydd wedi ei lunio

(1) O.S. 2021/198 (Cy. 46).

(2) O.S. 2017/56 (Cy. 26).

(3) O.S. 2015/1989 (Cy. 299); yr offerynnau diwygio perthnasol yw O.S. 2017/491 (Cy. 103), 2018/48 (Cy. 15) a 2019/760 (Cy. 143).

(4) 2020 dsc 1.

gan gorff perthnasol ar y cyd â chorff perthnasol arall yn unol â'r pwerau yn adran 14A(4) neu (5) o'r Ddeddf;”.

4.—(1) Mae rheoliad 10 (amcanion y byrddau partneriaeth rhanbarthol) wedi ei ddiwygio fel a ganlyn.

(2) Ym mharagraff (a)—

- (i) ar ddiwedd is-baragraff (i) hepgorer “a”;
- (ii) ar ddiwedd is-baragraff (ii) hepgorer yr hanner colon a mewnosoder—

“;

(iii) ymateb i'r adroddiad ar sefydlogrwydd y farchnad y mae'n ofynnol i awdurdodau lleol ei lunio a'i gyhoeddi o dan adran 144B(1) o'r Ddeddf,

(iv) hyrwyddo mentrau cymdeithasol, mentrau cydweithredol, gwasanaethau sy'n cael eu harwain gan ddefnyddwyr, a'r trydydd sector (yn unol â dyletswydd awdurdod lleol o dan adran 16 o'r Ddeddf) wrth ymateb i adroddiad ar sefydlogrwydd y farchnad, ac wrth weithredu cynllun ardal, neu gynllun ardal ar y cyd,

(v) hyrwyddo a hwyluso cyfranogiad plant o dan 18 oed mewn perthynas â phenderfyniadau sy'n effeithio arnynt ac a wneir wrth arfer y trefniadau partneriaeth (yn unol â dyletswydd awdurdod lleol o dan adran 12 o Fesur Plant a Theuluoedd (Cymru) 2010(1)), a

(vi) hyrwyddo datblygu trefniadau integredig o ran iechyd a gwasanaethau cymdeithasol;”.

(3) Ar ddiwedd paragraff (c) hepgorer yr atalnod llawn a mewnosoder—

“;

(d) gweithio gyda Chorff Llais y Dinesydd i hyrwyddo ymglymiad pobl y mae angen gofal a chymorth arnynt, a gofalwyr, yng ngwaith y trefniadau partneriaeth.”

5.—(1) Mae rheoliad 11 (aelodaeth o fyrddau partneriaeth rhanbarthol) wedi ei ddiwygio fel a ganlyn.

(2) Ar ddiwedd paragraff (1)(k) hepgorer yr atalnod llawn a mewnosoder—

“;

- (l) cynrychiolydd i Ymddiriedolaeth Gwasanaeth Iechyd Gwladol Gwasanaethau Ambiwylans Cymru(2);

(1) 2010 mecc 1.

(2) Sefydlwyd Ymddiriedolaeth Gwasanaeth Iechyd Gwladol Gwasanaethau Ambiwylans Cymru gan erthygl 2 o Orchymyn Ymddiriedolaeth Gwasanaeth Iechyd Gwladol

- (m) o leiaf un person i gynrychioli buddiannau darparwyr gwasanaethau gofal sylfaenol yn yr ardal a gwmpesir gan y bwrdd partneriaeth rhanbarthol;
- (n) o leiaf un person i gynrychioli buddiannau gweithwyr sy'n darparu gwasanaethau iechyd neu wasanaethau gofal cymdeithasol yn yr ardal a gwmpesir gan y bwrdd partneriaeth rhanbarthol;
- (o) o leiaf un person i gynrychioli'r Cynghorau Gwirfoddol Sirol(1) sy'n cynrychioli'r ardal a gwmpesir gan y bwrdd partneriaeth rhanbarthol.

(1A) Rhaid i fwrdd partneriaeth rhanbarthol wahodd cynrychiolydd o Gorff Llais y Dinesydd i fod yn aelod sy'n sylwedydd annibynnol o'r bwrdd.

(1B) Caiff bwrdd partneriaeth rhanbarthol wahodd unrhyw bersonau eraill y mae'n meddwl eu bod yn briodol i fod yn aelodau sy'n sylwedyddion annibynnol o'r bwrdd.

(1C) O ran aelod sy'n sylwedydd annibynnol a benodir o dan baragraff (1A) neu (1B)—

- (a) rhaid iddo gytuno i gael ei benodi i'r bwrdd i wasanaethu yn rhinwedd y swydd honno;
- (b) caiff gymryd rhan mewn unrhyw gyfarfod o'r bwrdd ond nid oes ganddo hawl i bleidleisio mewn unrhyw gyfarfod o'r bwrdd ar unrhyw gwestiwn sydd i'w benderfynu yn y cyfarfod hwnnw;
- (c) ni chaniateir iddo gael ei gyfrif mewn unrhyw gworwm ar gyfer cyfarfod o'r bwrdd."

(3) Ym mharagraff (4), yn y lle priodol yn nhrefn yr wyddor mewnosoder—

“ystyr “gwasanaethau gofal sylfaenol” (“*primary care services*”) yw'r gwasanaethau a ddarperir fel rhan o'r gwasanaeth iechyd gwladol yn unol â threfniadau a wneir gan Fyrddau Iechyd Lleol yn unol â Rhannau 4 i 7 o Ddeddf y Gwasanaeth Iechyd Gwladol (Cymru) 2006(2);”.

Gwasanaethau Ambiwylans Cymru (Sefydlu) 1998 (O.S. 1998/678).

(1) Mae 19 o Gynghorau Gwirfoddol Sirol yng Nghymru (CGS); prif swyddogaeth CGS yw darparu cyngor a gwybodaeth i grwpiau gwirfoddol a chymunedol lleol ar wirfoddoli, ffynonellau cyllido, etc.

(2) 2006 p. 42.

6. Ar ôl rheoliad 11 mewnosoder—

“Personau cyfrifol

11A.—(1) Rhaid i bob corff partneriaeth benodi person cyfrifol i hwyluso'r trefniadau partneriaeth a hyrwyddo cydweithredu rhwng—

- (a) y corff partneriaeth;
- (b) pob un o'r corff partneriaeth eraill o fewn y trefniant partneriaeth;
- (c) y bwrdd partneriaeth rhanbarthol.

(2) Rhaid i awdurdod lleol benodi'r person a benodir yn gyfarwyddwr gwasanaethau cymdeithasol o dan adran 144 o'r Ddeddf yn berson cyfrifol ar gyfer yr awdurdod.

(3) Rhaid i Fwrdd Iechyd Lleol benodi'r aelod gweithredol a benodir yn aelod o'r bwrdd partneriaeth rhanbarthol yn berson cyfrifol ar gyfer y Bwrdd.

(4) Rhaid i berson cyfrifol—

- (a) annog cydweithredu a gwaith partneriaeth o fewn y corff partneriaeth a'i penododd;
- (b) arwain o ran hyrwyddo cyfraniad y corff partneriaeth a'i penododd at gyflawni amcanion y bwrdd partneriaeth rhanbarthol;
- (c) adrodd yn ôl i'r cabinet neu, yn ôl y digwydd, i fwrdd y corff partneriaeth a'i penododd ar waith y bwrdd partneriaeth rhanbarthol.

Swyddogaethau gweinyddol byrddau partneriaeth rhanbarthol

11B.—(1) Rhaid i fwrdd partneriaeth rhanbarthol gyhoeddi disgrifiadau o rôl a chyfrifoldebau'r categorïau o aelodau'r bwrdd a bennir yn rheoliad 11.

(2) Rhaid i fwrdd partneriaeth rhanbarthol sefydlu a chyhoeddi'r weithdrefn ar gyfer recriwtio aelodau o'r bwrdd sy'n cynrychioli buddiannau personau y cyfeirir atynt yn rheoliad 11(1)(g) ac (h).

(3) Rhaid i fwrdd partneriaeth rhanbarthol ddarparu cymorth ac arweiniad i gynorthwyo aelodau o'r bwrdd, yn enwedig yr aelodau hynny sy'n cynrychioli buddiannau personau y cyfeirir atynt yn rheoliad 11(1)(g) ac (h) ac aelodau sy'n cynrychioli buddiannau sefydliadau y cyfeirir atynt yn rheoliad 11(1)(e).

Hunanasesu

11C.—(1) Rhaid i fwrdd partneriaeth rhanbarthol gyflawni hunanasesiad o'i berfformiad er mwyn gwerthuso i ba raddau y cyflawnodd yr amcanion a bennir yn rheoliad 10 (“ei amcanion”) yn ystod y 12 mis blaenorol a llunio adroddiad ar ei gasgliadau.

(2) Yn y rheoliad hwn ac yn rheoliad 12 (adroddiadau), cyfeirir at hunanasesiad a gyflawnwyd ac adroddiad a luniwyd o dan baragraff (1) gyda'i gilydd fel “adroddiad hunanasesu”.

(3) Rhaid i adroddiad hunanasesu hefyd gynnwys manylion unrhyw weithredoedd y mae'r bwrdd yn bwriadu ymgymryd â hwy, ac unrhyw weithredoedd y mae wedi ymgymryd â hwy eisoes, gyda'r nod o gynyddu'r graddau y bydd yn cyflawni ei amcanion yn y flwyddyn sy'n dilyn y flwyddyn y mae'r adroddiad yn ymwneud â hi.

(4) Rhaid i adroddiad hunanasesu (heblaw adroddiad hunanasesu cyntaf bwrdd partneriaeth rhanbarthol) gynnwys asesiad y bwrdd o'r graddau yr effeithiwyd ar gasgliadau'r bwrdd, sydd wedi eu cynnwys mewn adolygiad a gyflawnwyd o dan baragraff (7), o ganlyniad i unrhyw weithredoedd y mae wedi ymgymryd â hwy i gyflawni ei amcanion yn y 12 mis blaenorol.

(5) Rhaid llunio'r adroddiad hunanasesu cyntaf erbyn 1 Ebrill 2025.

(6) Rhaid llunio adroddiadau hunanasesu dilynol fesul ysbaid o ddwy flynedd erbyn 1 Ebrill.

(7) Rhaid i fwrdd partneriaeth rhanbarthol gyflawni adolygiad o adroddiad hunanasesu a luniwyd yn unol â'r rheoliad hwn.

(8) Rhaid i adolygiad o dan baragraff (7) gynnwys gwerthusiad o'r graddau y mae unrhyw weithredoedd gan y bwrdd, gan gynnwys gweithredoedd yr ymgymeryd â hwy yn unol â pharagraff (3), wedi cynyddu'r graddau y cyflawnodd y bwrdd ei amcanion yn y 12 mis ers i'r adroddiad hunanasesu gael ei lunio.

(9) Rhaid cyflawni'r adolygiad cyntaf erbyn 1 Ebrill 2026.

(10) Rhaid llunio adolygiadau dilynol fesul ysbaid o ddwy flynedd erbyn 1 Ebrill.

(11) Rhaid i fwrdd partneriaeth rhanbarthol gyhoeddi crynodeb o ganlyniadau adroddiad hunanasesu neu, yn ôl y digwydd, yr adolygiad

a gynhaliwyd yn unol â'r rheoliad hwn, mewn adroddiad a lunnir yn unol â rheoliad 12.”

7. Yn rheoliad 12 (adroddiadau), ar ôl paragraff (3) mewnosoder—

“(4) O 1 Ebrill 2025—

(a) rhaid i adroddiadau gynnwys—

- (i) disgrifiad o ddiben, rôl, aelodaeth, strwythur gweithredu a blaenoriaethau allweddol y bwrdd,
- (ii) gwybodaeth am sut y mae'r trefniadau partneriaeth wedi ymateb i'r asesiad o'r boblogaeth a'r adroddiad ar sefydlogrwydd y farchnad, ac i weithredu'r cynllun ardal neu, yn ôl y digwydd, y cynllun ardal ar y cyd,
- (iii) manylion am sut y defnyddiwyd adnoddau (wrth ddarparu gwybodaeth yn unol â pharagraff (ii)),
- (iv) gwybodaeth am y ffyrdd y mae'r bwrdd wedi cynorthwyo o ran integreiddio trefniadau iechyd a gwasanaethau cymdeithasol,
- (v) gwybodaeth am sut y mae'r bwrdd wedi cynorthwyo o ran darparu gwasanaethau yn well er mwyn sicrhau canlyniadau gwell i bobl,
- (vi) cyfrif o sut y mae'r bwrdd wedi ymgysylltu â dinasyddion (yn enwedig pobl y mae angen gofal a chymorth arnynt, gofalwyr, plant a phobl ifanc) yn ei waith,
- (vii) cyfrif o sut y mae'r bwrdd wedi hyrwyddo ymglymiad dinasyddion yn ei waith, ac asesiad o'r effaith y mae hynny wedi ei chael ar wella canlyniadau llesiant ar gyfer pobl yn yr ardal a gwmpesir gan y bwrdd partneriaeth rhanbarthol,
- (viii) gwybodaeth am unrhyw weithgarwch comisiynu ar y cyd a'r defnydd o gronfeydd cyfun yn y trefniadau partneriaeth,
- (ix) gwybodaeth am sut y mae'r cyrff partneriaeth wedi ymgysylltu â mentrau cymdeithasol, mentrau cydweithredol, gwasanaethau sy'n cael eu harwain gan ddefnyddwyr a sefydliadau'r trydydd sector (o fewn ystyr adran 16(2) o'r

Ddeddf) yn y trefniadau partneriaeth,

- (x) gwybodaeth am flaenoriaethau'r bwrdd ar gyfer y 12 mis nesaf,
 - (xi) crynodeb o adroddiad hunanasesu neu adolygiad a gynhaliwyd yn unol â rheoliad 11C, a
 - (xii) canlyniadau adolygiad a gynhaliwyd yn unol â rheoliad 8(2) o Reoliadau Gofal a Chymorth (Cynllunio Ardal) (Cymru) 2017 (monitro a gwerthuso: adolygiad blynyddol);
- (b) rhaid i bob corff partneriaeth gyhoeddi ar ei wefan adroddiad a luniwyd gan y bwrdd partneriaeth rhanbarthol o dan y rheoliad hwn.”

8. Yn Atodlen 1, yn Nhabl 1 (swyddogaethau awdurdodau lleol), ar ôl eitem 9 mewnosoder—

“10. Swyddogaethau awdurdod lleol o dan adran 12 o Fesur Plant a Theuluoedd (Cymru) 2010⁽¹⁾.

⁽¹⁾ 2010 mccc 1.”

RHAN 3

Diwygio'r Rheoliadau Cynllunio Ardal

9. Yn y Rheoliadau Cynllunio Ardal, yn lle rheoliad 7 rhodder—

“Monitro a gwerthuso: cynllun cyflawni blynyddol

7.—(1) Rhaid i gorff perthnasol neu, yn achos cynllun ardal ar y cyd, y cyrff perthnasol lunio a chyhoeddi cynllun cyflawni blynyddol sy'n pennu'r ffordd y bydd y gwasanaethau a'r gweithredoedd a nodir yn y cynllun ardal neu, yn ôl y digwydd, y cynllun ardal ar y cyd, yn cael eu cyflawni neu'r ffordd yr ymgwymerir â hwy er mwyn diwallu'r anghenion a nodir yn yr adroddiad asesiad poblogaeth yn ystod y 12 mis nesaf gan ddechrau â'r dyddiad y cyhoeddir y cynllun cyflawni blynyddol.

(2) Rhaid i'r cynllun cyflawni blynyddol cyntaf gael ei lunio a'i gyhoeddi gan gorff perthnasol neu, yn ôl y digwydd, y cyrff perthnasol erbyn 1 Ebrill 2025.

(3) Rhaid i bob corff perthnasol gyhoeddi ar ei wefan y cynllun cyflawni blynyddol a luniwyd gan y corff perthnasol neu, mewn achosion priodol, y cyrff perthnasol.

(4) Rhaid i gorff perthnasol neu, pan fo cynllun blynyddol ar y cyd wedi ei lunio, un o'r cyrff perthnasol gyflwyno i Weinidogion Cymru gopi o gynllun cyflawni blynyddol a luniwyd yn unol â'r rheoliad hwn.

Monitro a gwerthuso: adolygiad blynyddol

8.—(1) Rhaid i gorff perthnasol neu, yn achos cynllun ardal ar y cyd, y cyrff perthnasol gymryd camau priodol i fonitro a gwerthuso effaith cyflenwi'r gwasanaethau a'r gweithredoedd yr ymgwymerir â hwy yn unol â'r cynllun ardal neu, mewn achosion priodol, y cynllun ardal ar y cyd.

(2) Rhaid i gorff perthnasol neu, yn achos cynllun ardal ar y cyd, y cyrff perthnasol gynnal adolygiad blynyddol o'r cynnydd a wnaed wrth gyflawni'r cynllun ardal neu, yn ôl y digwydd, y cynllun ardal ar y cyd, o ganlyniad i'r gwasanaethau a ddarparwyd a'r gweithredoedd yr ymgwymerwyd â hwy yn unol â'r cynllun cyflawni blynyddol (wedi ei lunio yn unol â rheoliad 7(1)) ar gyfer y cyfnod 12 mis blaenorol.

(3) Rhaid i'r adolygiad blynyddol cyntaf gael ei gynnal gan gorff perthnasol neu, yn ôl y digwydd, y cyrff perthnasol, erbyn 1 Ebrill 2026.

(4) Rhaid i gorff perthnasol neu, mewn achosion priodol, y cyrff perthnasol sicrhau bod canlyniadau adolygiad a gynhaliwyd yn unol â pharagraff (2) yn cael eu cynnwys fel rhan o'r adroddiad blynyddol a gyhoeddir gan y Bwrdd Partneriaeth Rhanbarthol perthnasol yn unol â rheoliad 12 o'r rheoliadau trefniadau partneriaeth.”

RHAN 4

Diwygio'r Rheoliadau Adroddiadau ar Sefydlogrwydd y Farchnad

10. Yn y Rheoliadau Adroddiadau ar Sefydlogrwydd y Farchnad, yn rheoliad 4 (cyhoeddi adroddiad ar sefydlogrwydd y farchnad)—

- (a) ar ddiwedd paragraff (1) mewnosoder “(yr adroddiad cyntaf)”;
- (b) yn lle paragraff (2) rhodder—

“(2) Rhaid i awdurdodau lleol gyhoeddi eu hail adroddiad ar sefydlogrwydd y farchnad erbyn 1 Medi 2027.

(3) Rhaid cyhoeddi adroddiadau dilynol ar sefydlogrwydd y farchnad fesul ysbaid nad yw’n fwy na phum mlynedd erbyn 1 Medi.”

Enw

Y Gweinidog Plant a Gofal Cymdeithasol o dan
awdurdod Ysgrifennydd y Cabinet dros Iechyd a Gofal
Cymdeithasol, un o Weinidogion Cymru
Dyddiad